



白氏文集卷第二

諷諭二

古調詩五言
凡五十八首

續古詩十首

戚戚復戚戚送君遠行役行役非中原海外黃沙磧
伶俜獨居妾迢遞長征客君望功名歸妾憂生死隔
誰家無夫婦何人不離拆所恨薄命身嫁遲別日迫
妾身有存沒妾心無改易生爲閨中婦死作山頭石

二

掩淚別鄉里飄飄將遠行茫茫綠野中春盡孤客情
驅馬上丘隴高低路不平風吹棠梨花啼鳥時一聲
古墓何代人不知姓與名化作路傍土年年春草生
感彼忽自悟今我何營營

三

朝采山上薇暮采山上薇歲晏薇亦盡飢來何所爲
坐飲白石水手把青松枝擊節獨長誦其聲清且悲
櫪馬非不肥所苦常繫維豢豕非不飽所憂竟爲犧
行行歌此曲以慰常苦飢

四

雨露長織草山苗高入雲風雪折勁木澗松摧爲薪
風摧此何意雨長彼何因百丈澗底死寸莖山上春
可憐苦節士感此涕盈巾

五

窈窕雙鬟女容德俱如玉晝居不踰閫夜行常秉燭
氣如合靈蘭心如貫霜竹宜當備嬪御胡爲守幽獨

六

無媒不得選年忽過三六歲暮望漢宮誰在黃金屋
邯鄲進娼女能唱黃花曲一曲稱君心恩榮連九族
栖栖遠方士讀書三十年業成無知己徒步來入關
長安多王侯英俊競攀援幸隨衆賓未得廁門館間
東閣有旨酒中堂有管絃何爲向隅客對此不開顏
富貴無是非主人終日歡貧賤多悔尤客子終夜歎
歸去復歸去故鄉貧亦安

七

涼風飄嘉樹日夜減芳華下有感秋婦攀條苦悲嗟
我本幽閑女結髮事豪家豪家多婢僕門內頗驕奢
良人近封侯出入鳴玉珂自從富貴來恩薄讒言多

冢婦獨守禮羣妾互竒衰但信言有玷不察心無瑕
容光未銷歇歡愛忽蹉跎何意掌上玉化爲眼中砂
盈盈一尺水浩浩千丈河勿言小大異隨分有風波
閨房猶復爾邦國當如何

八

心亦無所迫身亦無所拘何爲腸中氣鬱鬱不得舒
不舒良有以同心久離居五年不見面三年不得書
念此令人老抱膝坐長吁豈無盈樽酒非君誰與娛

九

攬衣出門行遊觀遶林渠澹澹春水暖東風生綠蒲
上有和鳴鴈下有掉尾魚飛沉一何樂鱗羽各有徒
而我方獨處不與之子俱顧彼自傷已禽魚之不如

出遊欲遣憂孰知憂有餘

十

春日日初出曛曛耀晨輝草木照未遠浮雲已蔽之
天地黯似晦當午如昏時雖有東南風力微不能吹
中園何所有滿地青青葵陽光委雲上傾心欲何依

秦中吟十首

并序

貞元元和之際予在長安聞見之間有足悲者因直
歌其事命爲秦中吟

議婚

天下無正聲悅耳即爲娛人間無正色悅目即爲姝
顏色非相遠貧富則有殊貧爲時所弃富爲時所趨
紅樓富家女金縷繡羅襦見人不斂手嬌癡二八初

毋兄未開口已嫁不須史綠窓貧家女寂寞二十餘
荆釵不直錢衣上無真珠幾迴人欲聘臨日又踟躕
主人會良媒置酒滿玉壺四座且勿飲聽我歌兩途
富家女易嫁嫁早輕其夫貧家女難嫁嫁晚孝於姑
聞君欲娶婦娶婦意何如

重賦

厚地植桑麻所要濟生民生民理布帛所求活一身
身外充征賦上以奉君親國家定兩稅本意在愛人
厥初防其濫明勅內外臣稅外加一物皆以枉法論
柰何歲月久貪吏得因循浚我以求寵歛索無冬春
織絹未成疋縑絲未盈斤里胥迫我納不許暫逡巡
歲暮天地閉陰風生破村夜深烟火盡霰雪白紛紛
幼者形不蔽老者體無溫悲喘與寒氣併入鼻中辛
昨日輸殘稅因窺官庫門繒帛如山積絲絮似雲屯
號爲羨餘物隨月獻至尊奪我身上暖買爾眼前恩
進入瓊林庫歲久化爲塵

傷宅

誰家起甲第朱門大道邊豐屋中櫛比高墻外迴環
纍纍六七堂棟宇相連延一堂費百萬鬱鬱起青烟
洞房溫且清寒暑不能干高堂虛且迥坐卧見南山
繞廊紫藤架夾砌紅藥欄攀枝摘櫻桃帶花移牡丹
主人此中坐十載爲大官厨有臭敗肉庫有貫朽錢
誰能將我語問爾骨肉間豈無窮賤者忍不救飢寒
如何奉一身直欲保千年不見馬家宅今作奉誠園

傷友又云傷苦節士

陋巷孤寒士出門苦恻恻雖云志氣在豈免顏色低
平生同門友通籍在金閨曩者膠漆契邇來雲雨睽
正逢下朝歸軒騎五門西是時天久陰三日雨淒淒
蹇驢避路立肥馬當風嘶迴頭忘相識占道上沙堤
昔年洛陽社貧賤相提携今日長安道對面隔雲泥
近日多如此非君獨慘悽死生不變者唯聞任與黎

任公孫黎逢

不致仕

七十而致仕禮法有明文何乃貪榮者斯言如不聞
可憐八九十齒墮雙眸昏朝露貪名利夕陽憂子孫
掛冠顧翠綵懸車惜朱輪金章腰不勝偃僂入君門
誰不愛富貴誰不戀君恩年高須告老名遂合退身
少時共嗤謂晚歲多因循賢哉漢二疎彼獨是何人
寂寞東門路無人繼去塵

立碑

勲德既下衰文章亦陵夷但見山中石立作路旁碑
銘勲悉太公叙德皆仲尼復以多為貴千言直萬貲
為文彼何人想見下筆時但欲愚者悅不思賢者嗤
豈獨賢者嗤仍傳後代疑古石蒼苔字安知是愧詞
我聞望江縣麴令撫孳婺麴今名信陵在官有仁政名不
聞京師身歿欲歸葬百姓遮路岐攀轅不得去畱葬
此江湄至今道其名男女涕皆垂無人立碑碣唯有
邑人知

輕肥

意氣驕滿路鞍馬光照塵借問何爲者人稱是內臣
朱紱皆大夫紫綬或將軍誇赴軍中宴走馬去如雲
罇罍溢九醞水陸羅八珍果擘洞庭橘膾切天池鱗
食飽心自若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當曾撫
大聲麗若散颯颯風和雨小聲細欲絕切切鬼神語
又如鵲報喜轉作猿啼苦十指無定音顛倒宮徵羽
坐客聞此聲形神若無主行客聞此聲駐足不能舉
嗟嗟俗人耳好今不好古所以綠窓琴日日生塵土

歌舞

秦城歲云暮大雪滿皇州雪中退朝者朱紫盡公侯
貴有風雲興富無饑寒憂所營唯第宅所務在追遊
朱門車馬客紅燭歌舞樓歡酣促密坐醉暖脫重裘
秋官爲主人廷尉居上頭日中爲一樂夜半不能休
豈知閔鄉獄中有凍死囚

買花

帝城春欲暮喧喧車馬度共道牡丹時相隨買花去
貴賤無常價酬直看花數灼灼百朵紅萋萋五束素
上張幄幕庇旁織笆籬護水洒復泥封移來色如故
家家習爲俗人人迷不悟有一田舍翁偶來買花處
低頭獨長歎此歎無人諭一叢深色花十戶中人賦

贈友五首

并序

吾友有王佐之才者以致君濟人爲已任識者深許之因贈是詩以廣其志云

一年十二月每月有常令君出臣奉行謂之握金鏡由茲六氣順以遂萬物性時令一反常生靈受其病周漢德下衰王風始不競又從斬晁錯諸侯益強盛百里不同禁四時自爲政盛夏興土功方春勦人命誰能救其失待君佐邦柄峩峩象魏門懸法彝倫正

二

銀生楚山曲金生鄱溪濱南人弃農業求之多苦辛披砂復鑿石矻矻無冬春手足盡皴胝愛利不愛身畚田旣慵斫稻田亦懶耘相携作游手皆道求金銀畢竟金與銀何殊沉與塵且非衣食物不濟飢寒人

三

弃本以趨末日富而歲貧所以先聖王弃藏不爲珍誰能反古風待君秉國鈞捐金復抵璧勿使勞生民私家無錢鑪平地無銅山胡爲秋夏稅歲歲輸銅錢錢力日已重農力日已殫賤糶粟與麥賤賀絲與綿歲暮衣食盡焉得無飢寒吾聞國之初有制垂不刊傭必筭丁口租必計桑田不求土所無不強人所難量入以爲出上足下亦安兵興一變法兵息遂不還使我農桑人顛顛畎間誰能革此弊待君秉利權復彼租傭法令如貞觀年

四

京師四方則王化之本根長吏乂於政然後風教敦

如何尹京者遷次不逡巡請君屈指數十年十五人
科條日相矯吏力亦以勤寬猛政不一民心安得淳
九州雍爲首羣牧之所遵天下率如此何以安吾民
誰能變此法待君贊絲綸慎擇循良吏令其長子孫

五

三十男有室二十女有歸近代多離亂婚姻多過期
嫁娶既不早生育常苦遲兒女未成人父母已衰羸
凡人貴達日多在長大時欲報親不待孝心無所施
哀哉三牲養少得及庭闈惜哉萬鍾粟多用飽妻兒
誰能正婚禮待君張國維庶使孝子心皆無風樹悲

寓意詩五首

豫樟生深山七年而後知挺高二百丈本末皆十圍

天子建明堂此材獨中規匠人執斤墨采度將有期
孟冬草木枯烈火燎山陂疾風吹猛焰從根燒到枝
養材三十年方成棟梁姿一朝爲灰燼柯葉無子遺
地雖生爾材天不與爾時不如糞土英猶有人掇之
已矣勿重陳重陳令人悲不悲焚燒苦但悲采用遲

二

赫赫京內史炎炎中書郎昨傳徵拜日恩賜頗殊常
貂冠水蒼玉紫綬黃金章佩服身未暖已聞竄遐荒
親戚不得別吞聲泣路旁賓客亦已散門前雀羅張
富貴來不久倏如瓦溝霜權勢去尤速瞥若石火光
不如守貧賤貧賤可久長傳語宦遊子且來歸故鄉

三

促織不成章提壺但聞聲嗟哉蟲與鳥無實有虛名
與君定交日久要如弟兄何以示誠信白水指為盟
雲雨一為別飛沉兩難并君為得風鵬我為失水鯨
音信日已踈恩分日已輕窮通尚如此何況死與生
乃知擇交難須有知人明莫將山上松結託水上萍

四

翩翩兩玄鳥本是同巢鸞分飛來幾時秋夏炎涼變
一宿蓬華廬一栖明光殿偶因銜泥處復得重相見
彼矜本梁貴此嗟茅棟賤眼看秋社至兩處俱難戀
所託各暫時胡為相歎羨

五

婆娑園中樹根株大合圍蠢爾樹間虫形質一何微
孰謂虫至微虫蠹已無期孰謂樹之大花葉有衰時
花衰夏未實葉病秋先萎樹心半為土觀者安得知
借問虫何在在在身不在枝借問虫何食食心不食皮
豈無啄木鳥嘴長將何為

讀史五首

楚懷放靈均國政亦荒淫彷徨未忍決遠澤行悲吟
漢文疑賈生謫置湘之陰是時刑方措此去難為心
士生一代間誰不有浮沉良時真可惜亂世何足欽
乃知汨羅恨未抵長沙深

二

禍患如焚絲其來無端緒馬遷下蚕室嵇康就囹圄
抱冤志氣屈忍耻形神沮當被戮辱時奮飛無翅羽

商山有黃綺潁川有巢許何不從之遊超然離網罟
山林少羈鞅世路多艱阻寄謝伐檀人慎勿嗟窮處
三
漢日大將軍少爲乞食子秦時故列侯老作鋤瓜士
春華何曄曄園中發苑李秋風忽蕭條堂上生荆杞
深谷變爲岸桑田成海水勢去未須悲時來何足喜
寄言榮枯者反復殊未已

四

含沙射人影雖病人不知巧言構人罪至死人不疑
掇蜂殺愛子掩鼻戮寵姬弘恭陷蕭望趙高謀李斯
陰德旣必報陰禍豈虛施人事雖可罔天道終難欺
明則有刑辟幽則有神祇苟免勿私喜鬼得而誅之

五

季子憔悴時婦見不下機買臣負薪日妻亦弃如遺
一朝黃金多佩印衣錦歸去妻不敢視婦嫂強依依
富貴家人重貧賤妻子欺奈何貧富間可移親愛志
遂使中人心汲汲求富貴又令下人力各競錐刀利
隨分歸舍來一取妻拏意

和荅詩十首

并序

五年春微之從東臺來不數日又左轉爲江陵士曹
掾詔下日會予下內直歸而微之已即路邂逅相遇
於街衢中自永壽寺南抵新昌里北得馬上話別語
不過相勉保方寸外形骸而已因不暇及他是夕足
下次于山北寺僕職役不得去命季弟送行且奉新

詩一軸致於執事凡二十章率有比興淫文艷韻無一字焉意者欲足下在途諷讀且以遣日時消憂懣又有以張直氣而扶壯心也及足下到江陵寄在路所爲詩十七章凡五六千言言有爲章爲旨迨于宮律體裁皆得作者風發緘開卷且喜且恠僕思牛僧孺戒不能示他人唯與杓直拒非及樊宗師輩三四人時一吟讀心甚貴重然竊思之豈僕所奉者二十章遽能開足下聰明使之然也抑又不知足下是行也天將屈足下之道激足下之心使感時發憤而臻於此耶若兩不然者何立意措辭與足下前時詩如此之相遠也僕旣羨足下詩又憐足下心盡欲引狂簡而和之屬直宿拘牽無暇日故不即時如意旬月來多乞病假假中稍閒且摘卷中尤者繼之十章亦不下三千言其間所見同者固不能自異異者亦不能強同同者謂之和異者謂之答并別錄和夢遊春詩一章各附于本篇之末餘未和者亦續致之頃者在科試間常與足下同筆硯每下筆時輒相顧共患其戀太切而理太周故理太周則辭繁意太切則言激然與足下爲文所長在於此所病亦在於此足下來序果有詞犯文繁之說今僕所和者猶前病也待與足下相見日各引所作稍刪其繁而晦其義焉餘具書白

和思歸樂

山中不栖鳥夜半聲嚶嚶似道思歸樂行人淹泣聽

皆疑此山路遷客多南征憂憤氣不散結化爲精靈
我謂此山鳥本不因人生人心自懷土想作思歸鳴
孟嘗平居時娛耳琴泠泠雍門一言感未奏淚沾纓
魏武銅雀妓日與歡樂并一旦西陵望欲歌先涕零
峽猿亦何意隴水復何情爲入愁人耳皆爲腸斷聲
請看元侍御亦宿此郵亭因聽思歸鳥神氣獨安寧
問君何以然道勝心自平雖爲南遷客如在長安城
云得此道來何慮亦何營窮達有前定憂喜無交爭
所以事君日持憲立大庭雖有迴天力撓之終不傾
况始三十餘年少有直名心中志氣大眼前爵祿輕
君恩若雨露君威若雷霆退不苟免難進不曲求榮
在火辨玉性經霜斲松貞展禽任三黜靈均長獨醒
獲戾自東洛貶官向南荆再拜辭闕下長揖別公卿
荊州又非遠驛路半月程漢水照天碧楚山插雲青
江陵橘似珠宜城酒如餉誰謂譴謫去未妨遊賞行
人生百歲內天地暫寓形太倉一稊米大海一浮萍
身委逍遙篇心付頭陀經尚達死生觀寧爲寵辱驚
中懷苟有主外物安能縈任意思歸樂聲聲啼到明

和陽城驛

商山陽城驛中有歎者誰去是元監察江陵謫去時
忽見此驛名良久涕欲垂何故陽道州名姓同於斯
憐君一寸心寵辱誓不移疾惡若巷伯好賢如緇衣
沉吟不能去意者欲改爲改爲避賢驛大署於門楣
荆人愛羊祜戶曹改爲辭一字不忍道况兼姓呼之

因題八百言言直文甚奇詩成寄與我鏗若金和絲
上言陽公行友悌無等夷骨肉同衾裯至死不相離
次言陽公迹夏邑始棲遲鄉人化其風少長皆孝慈
次言陽公道終日對酒卮兄弟笑相顧醉貌紅怡怡
次言陽公節蹇蹇居諫可誓心除國蠹決死犯天威
終言陽公命左遷天一道州炎瘴地身不得生歸
一一皆實錄事事無子凡是爲善者聞之惻然悲
道州旣已矣往者不可追何世無其人來者亦可思
願以君子文告彼大樂師附於雅歌末奏之白玉墀
天子聞此章教化如法施直諫從如流佞臣惡如疵
宰相聞此章政柄端正持進賢不知倦去邪勿復疑
憲臣聞此章不敢懷依違諫官聞此章不忍縱詭隨

然後告史氏舊史有前規若作陽公傳欲令後世知
不勞叙世家不用費文辭但使國史上全錄元稹詩

荅桐花

山木多蒼鬱茲桐獨亭亭葉重碧雲片花簇紫霞英
是時三月天春暖山雨晴夜色向月淺暗香隨風輕
行者多商賈居者悉黎民無人解賞愛有客獨屏營
手攀花枝立足躡花影行生憐不得所死欲揚其聲
截爲天子琴刻作古人形云待我成器薦之於穆清
誠是君子心恐非草木情胡爲愛其華而反傷其生
老龜被剝腸不如無神靈雄雞自斷尾不願爲犧牲
况此好顏色花紫葉青青宜遂天地性忍加刀斧刑
我思五丁力拔入九重城當君正殿栽花葉生光晶

上對月中桂下覆堦前蔘汎拂香爐烟隱映斧藻屏
為君發清韻泠泠如叩瓊風來聲滿耳鄭衛不足聽
受君封植力不獨吐芬馨助君行春令開花應晴明
受君雨露恩不獨含芳榮戒君無戲言剪葉封弟兄
受君歲月功不獨資生成為君長高枝鳳凰上頭鳴
一鳴君萬歲壽如山不傾再鳴萬人泰泰階為之平
如何有此用幽滯在巖壑歲月不爾駐孤芳坐凋零
請向桐枝上為余題姓名待余有勢力移爾獻丹庭

和大觜鳥

鳥者種有二名同性不同觜小者慈孝觜大者貪庸
觜大命又長生來十餘冬物老顏色變頭毛白茸茸
飛來庭樹上初但驚兒童老巫生奸計與鳥意潛通
云是非凡鳥遙見起敬恭千歲乃一出喜賀主人翁
祥瑞來白日神靈占知風陰作北斗使能為人吉凶
此鳥所止家家產日夜豐上以致壽考下可宜田農
主人富家子身老心童蒙隨巫拜復祝婦姑亦相從
殺雞薦其肉敬若禋六宗鳥喜張大觜飛接在虛空
鳥既飽羶腥巫亦饗甘濃鳥巫互相利不復兩西東
日日營巢窟稍稍近房櫳雖生八九子誰辨其雌雄
羣雛又長我衆觜騁殘克探巢吞鷺卵入簇啄蚕虫
豈無乘秋隼羈絆委高墉但食鳥殘肉無施搏擊功
亦有能言鸚翅碧觜距紅暫曾說鳥罪囚閉在深籠
青青窓前柳鬱鬱井上桐貪鳥占栖息慈鳥獨不容
慈鳥爾奚為來往何憧憧曉去先晨鼓暮歸後昏鐘

辛苦塵埃，回飛啄禾黍叢，得食將母哺，飢腸不自充。
主人憎慈烏，命子削彈弓，絃續會稽竹，丸鑄荆山銅。
慈烏求母食，飛下爾庭中，數粒未入口，一丸已中胃。
仰天號一聲，似欲訴蒼穹，反哺日未足，非是惜微躬。
誰能持此寃，一爲問化工，胡然大觜烏，竟得天年終。

答四皓廟

天下有道見無道，卷懷之此乃聖人語，吾聞諸仲尼。
矯矯四先生，同稟希世資，隨時有顯晦，秉道無磷緇。
秦皇肆暴虐，二世構亂離，先生相隨去，商嶺採紫芝。
君看秦獄中，戮辱者李斯，劉項爭天下，謀臣竟悅隨。
先生如鸞鶴，出入冥冥飛，君看齊鼎中，焦爛者酈其。
子房得沛公，自謂相遇遲，八難掉舌樞，三畧役心機。

辛苦十數年，晝夜形神疲，竟雜霸者道，徒稱帝者師。
子房爾則能此，非吾所宜，漢高之季年，嬖寵鍾所私。
豕竈欲廢奪，骨肉相憂疑，豈無子房口，口舌無所施。
亦有陳平心，心計將何爲，皓皓四先生，高冠危映眉。
從容下南山，碩盼入東闈，前瞻惠太子，左右生羽儀。
却顧戚夫人，楚舞無光輝，心不畫一計，口不吐一詞。
暗定天下本，遂安劉氏危，子房吾則能此，非爾所知。
先生道旣光，太子禮甚卑，安車留不住，功成弃如遺。
如彼旱天雲，一雨百穀滋，澤則在天下，雲復歸希夷。
勿高巢與由，勿尚呂與伊，巢由往不返，伊呂去不歸。
豈如四先生，出處兩逶迤，何必長隱逸，何必長濟時。
由來聖人道，無朕不可窺，卷之不盈握，舒之亘八陲。

先生道甚明夫子猶或非願子辨其惑爲予吟此詩

和雉媒

吟君雉媒什一哂復一歎和之一何晚今日乃成篇
豈唯鳥有之抑亦人復然張陳刎頸交竟以勢不完
至今不平氣塞絕泚水源趙襄骨肉親亦以利相殘
至今不善名高於磨笄山况此籠中雉志在飲啄間
稻粱暫入口性已隨人遷身苦亦自忘同族何足言
但恨爲媒拙不足以自全勸君今日後養鳥養青鸞
青鸞一失侶至死守孤單勸君今日後結客結任安
主人賓客去獨住在門闌

和松樹

亭亭山上松一一生朝陽森聳上參天柯條百尺長

漠漠塵中槐兩兩夾康莊婆娑低覆地枝幹亦尋常
八月白露降槐葉次第黃歲暮滿山雪松色鬱青蒼
彼如君子心秉操貫冰霜此如小人面變態隨炎涼
共知松勝槐誠欲栽道傍糞土種瑤草瑤草終不芳
尚可以斧斤伐之爲棟梁殺身獲其所爲君構明堂
不然終天年老死在南岡不願亞枝葉低隨槐樹行

荅箭鏃

矢人職司憂爲箭恐不精精則利其鏃錯磨鋒鏑成
插以青竹斡羽之赤鴈翎勿言分寸鐵爲用乃長兵
聞有狗盜者晝伏夜潛行摩弓拭箭鏃夜射不待明
一盜旣流血百大同吠聲信信嗥不已主人爲之驚
盜心憎主人主人不知情反責鏃太利矢人獲罪名

寄言控弦者願君少留聽何不向西射西天有狼星
何不向東射東海有長鯨不然學仁貴三矢平虜廷
不然學仲連一發下燕城胡爲射小盜此用無乃輕
徒沾一點血虛污箭頭腥

和古社

廢村多年樹生在古社隈爲作妖狐窟心空身未摧
妖狐變美女社樹成樓臺黃昏行人過見者心徘徊
飢鷗竟不捉老犬反爲媒歲媚年少客十去九不迴
昨夜雲雨合烈風駢迅雷風拔樹根出雷劈社壇開
飛電化爲火妖狐燒作灰天明至其所清曠無氛埃
舊地葺村落新田闢荒萊始知天降火不必常爲災
勿謂神默默勿謂天恢恢勿喜犬不捕勿誇鷗不猜

寄言狐媚者天火有時來

和分水嶺

高嶺峻稜稜細泉流壘壘勢分合不得東西隨所委
悠悠草蔓底濺濺石罅裏分流來幾年晝夜兩如此
朝宗遠不及去溥三千里浸潤小無功山苗長旱死
縈紆用無所奔迫流不已唯作嗚咽聲夜入行人耳
有源殊不竭無坎終難至同出而異流君看何所似
有似骨肉親派別從茲始又似勢利交波瀾相背起
所以贈君詩將君何所比不比山上泉比君井中水

有木詩八首

并序

余嘗讀漢書列傳見佞順嬖嬰圖身忘國如張禹輩
者見惑上意下交亂君親如江充輩者見暴狠跋扈

壅君樹黨如梁冀輩者見色仁行違先德後賊如王
莽輩者又見外狀恢弘中無實用者又見附離權勢
隨之覆亡者其初皆有動人之才足以感衆媚主莫
不合於始而敗於終也因引風人騷人之興賦有木
八章不獨諷前人亦微後代爾

有木名弱柳結根近清池風煙借顏色雨露助華滋
峩峩白雪毛嫋嫋青絲枝漸密陰自庇轉高梢四垂
截枝扶爲杖軟弱不自持折條用樊圃柔脆非其宜
爲樹信可詆論材何所施可惜金堤地栽之徒爾爲

有木名櫻桃得地早滋茂葉密獨承日花繁偏受露
迎風暗搖動引鳥自來去鳥啄子難成風來枝莫住

低軟易攀翫佳人屢迴顧色求豔李饒心向松筠妬
好是映墻花本非當軒樹所以姓蕭人曾爲伐櫻賦

三

有木秋不凋青青在江北謂爲洞庭橘美人自移植
上受頤盼恩下勤澆漑力實成乃是枳臭苦不堪食
物有似是者真僞何由識美人默無言對之長嘆息
中含害物意外矯凌霜色仍向枝葉間潛生刺如棘

四

有木名杜梨陰森覆丘壑心蠹已空朽根深尚盤薄
媚狐言語巧天鳥聲音惡憑此爲巢穴往來互棲托
四傍五六本枝葉相交錯借問因何生秋風吹子落
爲長社壇下無人敢芟斫幾度野火來風迴燒不着

五

有木香冉冉山頭生一發主人不知名移種近軒闥
愛其有芳味因以調麪藥前後曾飲者十人無一活
豈徒悔封植兼亦誤采掇試問識藥人始知名野葛
年深已滋蔓刀斧不可伐何時猛風來爲我連枝拔

六

有不名水榭遠望青童童根株非勁挺柯葉多蒙籠
彩翠色如栢鱗皴皮似松爲同松栢類得列嘉樹中
枝弱不勝雪勢高常懼風雪壓低還舉風吹西復東
柔芳甚楊柳早落先梧桐惟有一堪賞中心無蠹虫

七

有木名凌霄懼秀非孤標偶依一株樹遂抽百尺條
託根附樹身開花寄樹梢自謂得其勢無因有動搖
一旦樹摧倒獨立暫飄颻疾風從東起吹折不終朝
朝爲拂雲花暮爲委地樵寄言立身者勿學柔弱苗

八

有木名丹桂四時香馥馥花團夜雪明葉剪春雲綠
風影清似水霜枝冷如玉獨占小山幽不容凡鳥宿
匠人愛芳直裁截爲厦屋幹細力未成用之君自速
重任雖大過直心終不曲縱非梁棟材猶勝尋常木

歎魯二首

季桓心豈忠其富過周公陽貨道豈正其權執國命
由來富與權不繫才與賢所託得其地雖愚亦獲安
甃肥因糞壤鼠穩依社壇虫獸尚如此豈謂無因緣

二
展禽胡爲者直道竟三黜顏子何如人屢空聊過日
皆懷王佐道不踐陪臣秩自古無奈何命爲時所屈
有如草木分天各與其一荔枝非名花牡丹無甘實

反鮑明遠白頭吟

炎炎者烈火營營者小蠅火不熱貞玉蠅不點清冰
此苟無所受彼莫能相仍乃知物性中各有能不能
古稱怨恨死則人有所懲懲淫或應可在道未爲弘
譬如蜩鷓徒啾啾卓龍鵬宜當委之去寥廓高飛騰
豈能泥塵下區區酬怨憎胡爲自苦吞悲仍撫膺

青塚

上有飢鴈號下有枯蓬走茫茫邊雪裏一掬沙培塿
傳是昭君墓埋閉蛾眉久凝脂化爲泥鉛黛復何有
時有陰怨氣常生墳左右鬱鬱如苦霧不隨骨銷朽
婦人無他才榮枯繫妍否何乃明妃命獨懸畫工手
丹青一註誤白黑相紛紜遂使君眼中西施作嫫母
同儕傾寵幸異數爲配偶禍福安可知美顏不如醜
何言一時事可戒千年後特報後來姝不須倚眉首
無辭插荆釵嫁作貧家婦不見青塚上行人爲澆酒

雜感

君子防悔尤賢人戒行藏嫌疑遠瓜李言動慎毫芒
立教固如此撫事有非常爲君持所感仰面問蒼蒼
犬嚙桃樹根李樹反見傷老龜烹不爛延禍及枯桑
城門自焚蕪池魚罹其殃陽貨肆兇暴仲尼畏於匡

魯酒薄如水邶鄆開戰場伯禽鞭見血過失由成王
都尉身降虜宮刑加子長呂安兄不道都市殺嵇康
斯人死已久其事甚昭彰是非不由已禍患安可防
使我千載後涕泗滿衣裳

白氏文集卷第二

白氏文集卷第三

諷諭三

凡二十首

新樂府

并序元和四年為左拾遺時作

序曰凡九千二百五十二言斷為五十篇篇無定句
句無定字繫於意不繫於文首句標其目卒章顯其
志詩三百之義也其辭質而徑欲見之者易諭也其
言直而切欲聞之者深誠也其事覈而實使采之者
信也其體順而肆可以播於樂章歌曲也摠而言
之為君為臣為民為物為事而作不為文而作也

七德舞美撥亂陳王業也

法曲歌美列聖正華聲也

二王後明祖宗之意也

海漫漫戒求仙也

立部伎刺雅樂之替也

華原磬刺樂工非其人也

上陽白髮人愍怨曠也

胡旋女戒近習也

新豐折臂翁戒邊功也

太行路借夫婦以諷君臣之不終也

司天臺引古以儆今也

捕蝗刺長吏也

昆明春水滿思王澤之廣被也

城鹽州美聖謨而誚邊將也

道州民美臣遇明主也

馴犀感爲政之難終也

五絃彈惡鄭之奪雅也

蠻子朝刺將驕而相備位也

驃國樂欲王化之先邇後遠也

縛戎人達窮民之情也

驪宮高美天子重惜人之財力也

百鍊鏡美皇王鑒也

青石激忠烈也

兩朱閣刺佛寺寢多也

西涼伎刺封壇之臣也

八駿圖戒奇物懲佚遊也

澗底松念寒雋也

牡丹芳美天子憂農也

紅線毯憂蚕桑之費也

杜陵叟傷農夫之困也

繚綾念女工之勞也

賣炭翁苦官市也

母別子刺新間舊也

陰山道疾貪虜也

時世粧倣戒也

李夫人鑒嬖惑也

陵園妾憐幽閉也

鹽商婦惡幸人也

杏為梁刺居處奢也

井底引銀瓶止淫奔也

官牛諷執政也

紫毫筆譏失職也

隋堤柳憫亡國也

草茫茫懲厚葬也

古塚狐戒艷色也

黑潭龍疾貪吏也

天可度惡詐人也

秦吉了哀冤民也

鷓九劍思決壅也

採詩官監前王亂亡之由也

七德舞 武德中天子始作秦王破陳樂以歌太宗之功業貞觀初太宗重制破陳

樂舞圖詔魏徵虞世南等為之歌詞名七德舞自龍朔已後詔郊廟享宴皆先奏之

七德舞七德歌傳自武德至元和元和小臣白居易

觀舞聽歌知樂意樂終稽首陳其事太宗十八舉義

兵白旄黃鉞定兩京擒充戮竇四海清二十有四功

業成二十有九即帝位三十有五致太平功成理定

何神速速在推心置人腹亡卒遺骸散帛收貞觀初

陣死骸骨致祭瘞埋之饑人賣子分金贖貞觀五年

尋又散帛以求之也魏徵夢見天子泣魏徵疾亟

鬻男女者詔出御府金徵別既寤流涕是夕徵卒故御親制碑云昔張謹哀

聞辰日哭張公謹卒太宗為之舉哀有司奏曰在辰

情也情發於中安怨女三千放出宮太宗常謂侍臣

知辰日遂哭之宮情實可愍今將出之任求伉儷於是令左丞戴胄

死囚四百來歸獄貞觀六年親錄囚徒死罪者三百

應期畢至剪鬚燒藥賜功臣李勣嗚咽思殺身李勣

詔悉原之醫云得龍鬚燒灰方可療之太宗自剪鬚含血吮瘡

撫戰士思摩奮呼乞効死李勣常中弩太不獨善戰

善乘時以心感人人人心服爾來一百九十載天下至

今歌舞之歌七德舞七德聖人有作垂無極豈徒耀

神武豈徒誇聖文太宗意在陳王業王業艱難示子

孫

法曲歌

法曲法曲歌大定積德重熙有餘慶永徽之人舞而

詠永徽之思有貞觀之遺風故法曲法曲舞霓裳政

和世理音洋洋開元之人樂且康霓裳羽衣曲起於

法曲法曲歌堂堂堂之慶坐無疆中宗肅宗復鴻
業唐祚中興萬萬葉永隆元年太常丞李嗣貞善審音律能知興衰云近者樂府有法曲法曲合夷歌夷聲邪亂華聲和以
亂干和天寶末明年胡塵犯宮闕法曲雖佞失雅音蓋諸夏之聲也故
歷朝行焉玄宗雖雅度好曲然未嘗使蕃漢雜奏天寶十三載始詔諸道調法曲與胡部新聲合作識者深異之明年冬而安祿山反也乃知法曲本華風苟能審音與政通
一從胡曲相參錯不辨興衰與哀樂願求牙曠正華音不令夷夏相交侵

二王後

二王後彼何人介公鄴公為國賓周武隨文之子孫
古人有言天下者非是一人之天下周亡天下傳于
隋隋人失之唐得之唐興十葉歲二百介公鄴公世
為客明堂太廟朝享時引居賓位備威儀備威儀助
郊祭高祖太宗之遺制不獨興滅國不獨繼絕世欲
令嗣位守文君亡國子孫取為戒

海漫漫

海漫漫直下無底旁無邊雲濤煙浪最深處人傳中
有三神山山上多生不死藥服之羽化為天仙秦皇
漢武信此語方士年年采藥去蓬萊今古但聞名烟
水茫茫無覓處海漫漫風浩浩眼穿不見蓬萊島不
見蓬萊不敢歸童男艸女舟中老徐福文成多誑誕
上元太一虛祈禱君看驪山頂上茂陵頭畢竟悲風
吹蔓草何況玄元聖祖五千言不言藥不言仙不言
白日昇青天

立部伎

太常選坐部伎無性識者退入立部伎又選立部伎絕無性識者退入雅樂部則雅聲可知矣

立部伎鼓笛誼舞雙劍跳七九嫺巨索掉長竿太常部伎有等級堂上者坐堂下立堂上坐部笙歌清堂下立部鼓笛鳴笙歌一曲衆側耳鼓笛萬曲無人聽立部賤坐部貴坐部退爲立部伎擊鼓吹笙和雜戲立部又退何所任始就樂懸操雅音雅音替壞一至此長令爾輩調宮徵圓丘后土郊祀時言將此樂感神祇欲望鳳來百獸舞何異北轅將適楚工師愚賤安足云太常三卿爾何人

華原磬

天寶中始廢泗濱磬用華原石代之詢諸磬人則曰故老云泗濱磬下調之不能和得華原石考之乃和也是不改

華原磬華原磬古人不聽今人聽泗濱石泗濱石今人不擊古人擊今人古人何不同用之捨之由樂工樂工雖在耳如壁不分清濁即爲龔梨園弟子調律呂知有新聲不如古古稱浮磬出泗濱立辯致死聲感人宮懸一聽華原石君心遂亡封疆臣果然胡寇從燕起武臣少肯封疆死始知樂與時政通豈聽鏗鏘而已矣磬襲入海去不歸長安市人爲樂師華原磬與泗濱石清濁兩聲誰得知

上陽白髮人

天寶五載已後楊貴妃專寵後宮人無復進幸矣六宮有美色者輒置別所上陽是其一也貞元中尚存焉

上陽人紅顏暗老白髮新綠衣監使守宮門一閉上陽多少春玄宗末歲初選入入時十六今六十同時

采擇百餘人零落年深殘此身憶昔吞悲別親族扶
入車中不教哭皆云入內便承恩臉似芙蓉曾似玉
未容君王得見面已被楊妃遙側目妬令潛配上陽
宮一生遂向空房宿秋夜長夜長無寐天不明耿耿
殘燈照背影蕭蕭暗雨打窗聲春日遲日遲獨坐天
難暮宮鶯百轉愁馱聞梁燕雙栖老休妬鶯歸燕去
長悄然春往秋來不記年唯向深宮望明月東西四
五百迴圓今日宮中年最老大家遙賜尚書號小頭
鞋履窄衣裳青黛點眉眉細長外人不見見應笑天
寶末年時世粧上陽人苦最多少亦苦老亦苦少苦
老苦兩如何君不見昔時呂尚美人賦天寶末有密
采艷色者當時花鳥使呂尚
又不見今日上陽白髮歌
獻美人賦以諷之

胡旋女

天寶末康
居國獻之

胡旋女胡旋女心應絃手應鼓絃鼓一聲雙袖舉迴
雪飄飄轉蓬舞左旋右轉不知疲千匝萬周無已時
人間物類無可比奔車輪緩旋風遲曲終再拜謝天
子天子爲之微啓齒胡旋女出康居徒勞東來萬里
餘中原自有胡旋者鬪妙爭能爾不如天寶季年時
欲變臣妾人人學圓轉中有太真外祿山二人最道
能胡旋梨花園中冊作妃金雞障下養爲兒祿山胡
旋迷君眼兵過黃河疑未反貴妃胡旋感君心死棄
馬竄念更深從茲地軸天維轉五十年來制不禁胡
旋女莫空舞數唱此歌悟明主

新豐折臂翁

新豐老翁八十八頭鬢眉鬚皆似雪玄孫扶向店前行左臂憑肩右臂折問翁臂折來幾年兼問致折何因緣翁云貫屬新豐縣生逢聖代無征戰慣聽梨園歌管聲不識旗槍與弓箭無何天寶大徵兵戶有三丁點一丁點得駟將何處去五月萬里雲南行聞道雲南有瀘水椒花落時瘴烟起大軍徒涉水如湯未過十人二三死村南村北哭聲哀兒別爺娘夫別妻皆云前後征蠻者千萬人行無一迴是時翁年二十四兵部牒中有名字夜深不敢使人知偷將大石鎚折臂張弓箠旗俱不堪從茲使免征雲南骨碎筋傷非不苦且圖揀退歸鄉土此臂折來六十年一股雖廢一身全至今風雨陰寒夜直到天明痛不眠痛不

眠終不悔且喜老身今獨在不然當時瀘水頭身死

魂飛骨不收應作雲南望鄉鬼萬人塚上哭叨叨雲南

有萬人塚即鮮于仲通李密曾覆軍之所今塚猶存老人言君聽取君不聞開

元宰相宋開府不賞邊功防黷武開元初突厥數寇邊時天武軍牙將

郝雲岑出使因引特勒迴鵠部落斬突厥默啜獻首于闕下自謂有不世之功時宋璟為相以天子年少

好武恐激功者生心痛抑其黨逾年始授郎將雲岑遂慟哭嘔血而死又不聞天寶宰相楊國忠欲求恩幸立邊功邊功未立生人怨請問

新豐折臂翁天寶末楊國忠為相重結閣羅鳳之役募人討之前後發二十餘萬衆去無返

者又捉人連枷赴役天下怨哭人不聊生故祿山得乘人心而盜天下元和初而折臂翁猶存因備歌之

太行路

太行之路能摧車若比君心是坦途巫峽之水能覆舟若比君心是安流君心好惡苦不常好生毛羽惡

生瘡與君結髮未五載豈期牛女爲參商古稱色衰
相棄背當時美人皆怨悔何況如今鸞鏡中妾顏未
改君心改爲君薰衣裳君聞蘭麝不馨香爲君盛容
飾君看珠翠無顏色行路難難重陳人生莫作婦人
身百年苦樂由他人行路難難於山險於水不獨人
間夫與妻近代君臣亦如此君不見左納言右納史
朝承恩暮賜死行路難不在水不在山只在人情反
覆間

司天臺

司天臺仰觀俯察天人際羲和死來職事廢官不求
賢空取藝昔聞西漢元成間上陵下替謫見天北辰
微暗少光色四星煌煌如火赤耀芒動角射三台上
台半滅中台圻是時非無太史官眼見心知不敢言
明朝趨入明光殿唯奏慶雲壽星見天文時變兩如
斯九重天子不得知不得知安用臺高百尺爲

捕蝗

捕蝗捕蝗誰家子天熱日長饑欲死興元兵久傷陰
陽和氣蠱蠹化爲蝗始自兩河及三輔荐食如蚕飛
似雨雨飛蚕食千里間不見青苗空赤土河南長吏
言憂農課人晝夜捕蝗蟲是時粟斗錢三百蝗蟲之
價與粟同捕蝗捕蝗竟何利徒使饑人重勞費一蟲
雖死百蟲來豈將人力定天災我聞古之良吏有善
政以政駟蝗蝗出境又聞貞觀之初道欲昌文皇仰
天吞一蝗一人有慶兆民賴是歲雖蝗不爲害

貞觀
年

太宗吞蝗虫事
具貞觀實錄

昆明春水滿

貞元中始漲之

昆明春昆明春春池岍古春流新影浸南山青滉漾
波沉西日紅齋淪往年因旱靈池竭龜尾曳塗魚噉
沫詔開分水注恩波千介萬鱗同日活今來淨淥水
照天游魚鱖鱖蓮田田洲香杜若抽心短沙暖鴛鴦
鋪翅眠動植飛沉皆遂性皇澤如春無不被漁者仍
豐網罟資貧人久獲菰蒲利詔以昆明近帝城宦家
不得收其征菰蒲無租魚無稅近水之人感君惠感
君惠獨何人吾聞率土皆王民遠民何踈近何親願
推此惠及天下無遠無近同欣欣吳興山中罷推茗
鄱陽坑裏休封銀天涯地角無禁利熙熙同似昆明

春

城鹽州

貞元歲壬申特詔城之

城鹽州城鹽州城在五原原上頭蕃東節度鉢闡布
忽見新城當要路金鳥飛傳贊普聞建牙傳箭集羣
臣君臣頽面有憂色皆言勿謂唐無人自築鹽州十
餘載左衽氊裘不犯塞晝牧牛羊夜捉生長去新城
百里外諸邊急驚來戍人唯此一道無烟塵靈夏潛
安誰復辯秦原暗通何處見鄜州驛路好馬來長安
藥肆黃著賤城鹽州城鹽州未城天子憂德宗按圖
自定計非關將略與廟謀吾聞高宗中宗世北虜猖
狂最難制韓公創築受降城三城鼎峙屯漢兵東西
亘絕數千里耳聆不聞胡馬聲如今邊將非無策心

笑韓公築城壁相看養寇爲身謀各握強兵固恩澤
願分今日邊將恩褒贈韓公封子孫誰能將此鹽州
曲翻作歌詞聞至尊

道州民

道州民多侏儒長者不過三尺餘市作矮奴年進送
號爲道州任土貢任土貢寧若斯不聞使人生別離
老翁哭孫母哭兒一自陽城來守郡不進矮奴頻詔
問城云臣按六典書任土貢有不貢無道州水土所
生者只有矮民無矮奴吾君感悟璽書下歲貢矮奴
宜悉罷道州民老者幼者何欣欣父兄子弟始相保
從此得作良人身道州民民到于今受其賜欲說使
君先下淚仍恐兒孫忘使君生男多以陽爲字

馴犀

貞元丙戌歲南海進馴犀詔納苑
中至十三年冬大寒馴犀死矣

馴犀馴犀通天犀軀貌駭人角駭雞海蠻聞有明天
子馱犀乘傳來萬里一朝得謁大明宮歡呼拜舞自
論功五年馴養始堪獻六譯語言方得通上嘉人獸
俱來遠蠻館四方犀入苑餽以瑤蔔鑊以金故鄉迢
迢君門深海鳥不知鍾鼓樂池魚空結江湖心馴犀
生處南方熱秋無白露冬無雪一入上林三四年又
逢今歲苦寒月飲冰卧霰苦踰腸骨凍傷鱗甲躡
馴犀死蠻兒啼向闕再三顏色低奏乞生歸本國去
恐身凍死似馴犀君不見建中初馴象生還放林邑
建中元年詔盡出苑
中馴象放歸南方也君不見貞元末馴犀凍死蠻兒
泣所嗟建中異貞元象生犀死何足言

五絃彈

五絃彈五絃彈聽者傾耳心寥寥趙璧知君入骨愛
五絃一一爲君調第一第二絃索索秋風拂松踈韻
落第三第四絃泠泠夜鶴憶子籠中鳴第五絃聲最
掩抑隴水凍咽流不得五絃並奏君試聽淒淒切切
復錚錚鐵擊珊瑚一兩曲水寫玉盤千萬聲殺聲入
耳膚血寒慘氣中人肌骨酸曲終聲盡欲半日四座
相對愁無言座中有一遠方士唧唧咨咨聲不已自
嘆今朝初得聞始知孤負平生耳唯憂趙璧白髮生
老死人間無此聲遠方士耳聽五絃信爲美吾聞正
始之音不如是正始之音其若何朱絃踈越清廟歌
一彈一唱再三嘆曲淡節稀聲不多融融曳曳召元
氣聽之不覺心平和人情重今多賤古古琴有絃人
不撫更從趙璧藝成來二十五絃不如五

蠻子朝

蠻子朝汎皮船兮渡繩橋來自雋州道路遙入界先
經蜀川過蜀將收功先表賀臣聞雲南六詔蠻東連
牂牁西連蕃六詔星居初鎖碎合爲一詔漸強大開
元皇帝雖聖神唯蠻倔强不來賓鮮于仲通六萬卒
征蠻一陣全軍沒至今西洱河岍邊箭孔刀痕滿枯
骨天寶十三載鮮于仲通統兵六萬討雲南王閣羅鳳于西洱河全軍覆沒也誰知今日
慕華風不勞一人蠻自通誠由陛下休明德亦賴微

臣誘諭功德宗省表知如此笑令中使迎蠻子蠻子
道從者誰何摩挲俗羽雙隈伽清平官持赤藤杖大

將軍繫金呿嗟異牟尋男尋閭勸持勅召對延英殿
上心貴在懷遠蠻引臨玉座近天顏冕旒不坐親勞
俵賜衣賜食移時對移時對不可得大臣相看有羨
色可怜宰相拖紫佩金章朝日唯聞對一刻

驃國樂

貞元十七
年來獻之

驃國樂驃國樂出自大海西南角雍羗之子舒難陀
來獻南音奉正朔德宗立仗御紫庭黠曠不塞爲爾
聽玉螺一吹椎髻聳銅鼓一擊文身踊珠纓炫轉星
宿搖花鬘抖擻龍虵動曲終王子啓聖人臣父願爲
唐外臣左右歡呼何翕習皆尊德廣之所及須臾百
辟詣閭門俯伏拜表賀至尊伏見驃人獻新樂請書
國史傳子孫時有擊壤老農父暗測君心間獨語聞
君政化甚聖明欲感人心致太平感人在近不在遠
太平由實非由聲觀身理國國可濟君如心兮民如
體體生疾苦心慘悽民得和平君愷悌貞元之民若
未安驃樂雖聞君不歡貞元之民苟無病驃樂不來
君亦聖驃樂驃樂徒喧喧不如聞此芻蕘言

縛戎人

縛戎人縛戎人口穿面破駘入秦天子矜憐不忍殺
詔徙東南吳與越黃衣小使錄姓名領出長安乘迤
行身被金瘡面多瘡扶病徒行日一驛朝餐飢渴費
杯盤夜臥腥臊汚牀席忽逢江水憶交流垂手齊聲
嗚咽歌其中一虜語諸虜爾苦非多我苦多同伴行
人因借問欲說喉中氣憤憤自云鄉管本涼原大曆

年中沒落蕃一落蕃中四十載身著皮裘繫毛帶唯
許正朝服漢儀歛衣整巾潛淚坐誓心密定歸鄉計
不使蕃中妻子知有李如暹者蓬子將軍之子也嘗
唐人之沒蕃者服唐衣冠由云蕃法唯正歲一日許
是悲不自勝遂密定歸計也暗思自有殘筋骨更恐
年衰歸不得蕃候嚴兵鳥不飛脫身冒死奔逃歸晝
伏宵行經大漠雲陰月黑風沙惡驚藏青塚寒草踈
偷度黃河夜水薄忽聞漢軍鼙鼓聲路傍走出再拜
迎游騎不聽能漢語將軍遂縛作蕃生配向江南卑
濕地定無存卹空防備念此吞聲仰訴天若爲辛苦
度殘年涼原鄉井不得見胡地妻兒虛棄捐沒蕃被
囚思漢土歸漢被劫爲蕃虜早知如此悔歸來兩地
寧如一處苦縛戎人戎人之中我苦辛自古此冤應
未有漢心漢語吐蕃身

白氏文集卷第三

國

